



柳田文庫
文庫11
147
5



文庫 11
D 147
5

010190553545



大雅集卷之五

天台賴 良善卿編輯

會稽楊維禎庶夫評點

孫

華

字元宴號果育老人雲間人

至順改元季夏大雨幾月

雨欲沉三版天應隔萬重元年書大水六月變窮冬消長關時宰艱危注老農蛟龍毋太橫於爾卜豐凶

召命因赴省以老母夜至嘉禾驛二



首

歲晚離家去更深上水舡犬鳴營柝外漁
唱驛燈前遠役關慈母孤忠仗老天極知
朱紱貴無柰綵衣妍

其二

漢使徵求急藩輿定省頻小人猶有母率
土莫非臣歲儉盤炊玉家貧酒泛銀自緣
憂鶴髮豈敢逆龍鱗

張

憲

字思燕號玉筍生會稽人

次許廷佐見喜寺樓韻

高樓名喜見遠客獨傷心鞍馬思劉備衣
冠惜華歆曙光浮海闊秋色到江深送目
闌干久冥鴻入窅沉

黃

璋

字仲珩華亭人

遣興

滿目烽烟在經春血淚垂素無投筆志空
有掛冠思江總真能仕陶潛托賦詩獨餘
心炯々靜夜月應知

其二

牢落悲生計艱難
嘆索居母兄皆寄食
兒女久無書井邑
兵戈滿郊園瓦礫
餘傷心春雨過農
事定何如

徐孝基

字立本章安人

寧海道中早行

中歲事行役勞生
卒未休大星垂野
白遠水際天浮土
俗魚鹽富民居橘
柚稠何年謝塵鞅
歸臥此林丘

劉

孺

字小齋江陰人

送朱自明調閩憲掾

昭代急才賢君今
甫妙年閩中烏府
客江上米家舫美
化移蠻俗清風歛
瘴烟好尋京兆老
珎重玉堂仙

釋宗衍

字道原

吳江晚泊

風壤三州接江湖
一水分虹消滄海
兩日落洞庭雲客
意終難盡漁歌寔
飽聞長思

陸魯望不出可忘君

秀州東郭舟中

自在眠沙鳥叅羗入郭舟山林吾計拙天
地此身浮曉氣成雲住晴波雜霧流攬衣
疑厚薄十月暖如秋

釋元本 字立中

東許廷佐

近聞新出處水北古招提鵬鷲凌塵出驂
騶顧主嘶失弓還問楚抱瑟漫過齊道上

將軍樹詩篇莫浪題

歸懷

憶昔兵戈際艱難覲省歸遮關歡進酒弟
姪戲牽衣慈竹春陰合萱花夕露微即今
懷父壠祭掃久相違

程煜 字彥明維揚人

過太湖

擊楫中流去西風客思催地吞南極盡波
撼北冥迴蛟館懸秋月龍宮起夜雷濯纓

人不見長嘯倒金壘

揚

基

字孟載蜀人

夏夜有懷

重露澄秋色輕風生夜涼
碧看湖州亂紅愛渚蓮香
有弟徒相憶何人不異鄉
悲笳在城上雙淚落衣裳

其二

西月離東井黃雲近紫微
秦州今日亂漢使幾時歸
故舊皆朱紱風塵只素衣
流螢

念孤寡相照入簾幃

邵思文

字彥文

簡報國寺僧清遠

聞說招提境空山紫翠中
法王新象馭天子舊龍宮
愛酒慙陶令能詩憶遠公
欲尋方丈室相續晉賢風

浙江亭

極目錢唐上千山列畫屏
雨晴江樹碧潮落海門青
對景悲王導移家憶管寧
臨風

一惆悵沽酒慰飄零

梁天祐

字祐之華亭人

遣懷

四十今年是亂離生百憂身居南海上家
在北山頭對酒心先醉看花淚欲流時危
賴支道禪榻重淹留

董

章

字士明四明人

輓邁里古思

大夫寧制虜元帥豈容文白髮難忘母丹

心只為君虎狼千里戰吳越半江分落日
孤城在忠良死後聞

次友人韻

唐室何多難詩愁杜拾遺皇天終厭亂聖
德本無虧自比當年事空懷故國悲一般
思弟妹不在漢鍾離

許

弼

字廷佐黃岩人

涼雨

火雲將晚臧涼雨忽西來天地秋先到江

湖客未回思家空有淚憂國豈無才萬里
關山道誰憐庾信哀

魯

淵

字道原曲阜人前進士

題馬文壁秋山圖

野館空山裏林泉象外幽淡雲初霽雨紅
葉早經秋路轉山藏屋橋岸倚舟直疑
人境異便欲問丹丘

俞

俊

字子俊

歎息

百年同轉燭五十始知非老病侵腰膂浮
名苦馬鞵閑門羅可設今兩客還稀空羨
茅堂燕翩翩傍母飛

沈

欽

字欽井

寄劉小齋

村迥葉落赤江空寒日黃野鴉隨處宿官
柳自成行無路歸秦客逢人問楚狂長歌
一回首悽惻向蒼茫

張

樞

得共辰弟詩次韻寄安慶建寧二弟
作

三弟一書歸經年萬事違舟移安慶雨雲
作建寧衣老去知心少春還見面稀閑愁
無着處開遍野薔薇

釋原靜字天鏡雲間人

重九

舊日重陽節惟尋曲水春忽經時到眼但
覺老隨人白髮雖多難黃花不厭貧登高

本無意踪跡愧紅塵

其二

故舊俱淪喪人情轉寂寥驅馳逢九日牢
落是今朝把菊難爲醉囊萸興自消江鄉
獨無賴風雨暗蕭蕭

顧天祿字謹中

夜泊

海近潮初上江清天倒流故鄉頻入夢此
地獨維舟落鴈沉霜鏡潛魚避月鉤不眠

催早發歷々數更籌

其二

城郭還依舊人民似昔非故鄉南去遠奉
使北來稀水落波聲小天空月色微客舟
隨處宿浪跡幾時歸

釋靜慧

字古明

寄梅雪朱隱居

何處風篁好漁莊路匪遙水光清暑簟花
影赤闌橋坐客分詩卷鄰姬浣酒瓢離懷

無可贈春夢過蘭茗

顧

或

字孔文

客夜

露下碧梧白風生玉籟幽關河今夜客天
地十年秋鼓角悲新鬼衣冠憶舊游都將
周顛泪洒遍黑貂裘

買

閭

字蕪善

和年弟聞人樞京城雜詩

鳳詔頒初罷花陰轉玉墀鹽梅調鼎餽絲

竹奏咸池風靜爐烟直雲開扇影移紫薇
花下客爭賦奪袍詩

其二

山勢北來遠河流東去長天階羅虎拜帝
室降龍祥石鼓苔痕碧金盤露氣涼慙無
董賈策三伏獻明光

其三

落魄南州士看花愧不先来承金馬詔及
見玉堂仙日月開雙闕星河麗九天何階

近帝袞身惹御爐烟

其四

霄漢樓臺湧春風燕雀飛櫻桃臣籥賜首
藉馬新肥清漏傳銀箭紅雲護袞衣窮經
晚進士慙授一官歸

雪

朔風吹破屋曙雪下續紘六合渾清氣千
山盡白雲老蛟深閉蟄獨鴈遠呼群想像
西湖路梅花瘦幾分

春雨

曉雨連山白春雲壓地陰叢篁栖雀亂芳
草落花深水闊西江眼天長北闕心孤桐
閑在壁忍操越南音

吳

哲

字子愚號淡雲野人華亭人

上藍寺和錙公輔

遠俗依蘭若清心愛竹房淨携蒼玉佩高
臥白雲鄉近坐天花密開函貝葉香方庭
涼月上隨意據胡床

題盛本初居易齋卷

自分驅馳懶那知踐履深風雲難強會箕
穎亦何心屑々齊門瑟悠々梁父吟周行
信如砥吾道孰銷沉

葉

把

字南有號漪南

幽懷

季子長遊日張翰早見幾秋菹侑魚飯霜
葉滿貂衣詭遇遭時寵才猷與世遠予生
傷往事甘老故山薇

陸燾

字子臨四明人

野晴

鴈影鄉書外江聲客思中
野晴秋穫竟村遠晚炊同
松桂如遠約文辭任懶攻
蕭吹鬢雪又見荻花風

大雅集卷之五

大雅集卷之六

天台賴良善卿編輯

會稽楊維禎庶夫評點

馮子振

字海粟

揚花

曾與行人惜翠條而今飛絮滿河橋
一分流水萍初碎百尺春風雪未消
微撲粧樓啼半面乍黏舞席折纖腰
沾泥更傍誰家砌簾戶新聲紫燕嬌

其二

婉婉春光與願違
悠揚風日暨無輝
不隨芳樹千林歇
還趁遊絲百尺飛
夢落吳蠶欺薄繭
心隨代馬戀征衣
鳳池踪跡逡巡到
未忍飄零拂釣磯

袁伯常

寄贈

白塔亭々透夕陽
芭蕉深處碧窻涼
江神夜頌光明偈
天女朝聞解脫香
齋鉢午空

烏守樹經臺雲冷鶴歸房
平生願結西方社
却咲淵明作吏忙

寄子昂

故國王孫佩楚蘭
春雲涼月倚朱闌
玉蕭曲趁鶯聲轉
金鼎香隨蝶夢殘
碧沚波清堪把釣
黃塵風急倦彈冠
外家文物惟君在
咲我冰姿跨曉鞍

張

翥

字仲舉

寄周伯溫

天子臨軒授鉞頻江南無地不紅巾鐵衣
遠道三軍老白骨中原萬鬼新義士英靈
虹貫日仙家談咲海揚塵多將滿眼淒涼
淚哭盡平生幾故人

送宋本禮部狀元調選回京

聖主求賢禮數崇策名高步冠南宮乘槎
析木天津上奏賦甘泉鹵簿中染翰墨凝
仙掌露護衣香散御爐風只今帝業熙千
載正待儒臣黼黻功

寄陳子華時留淮海

鳳在陽岡鶴在臯相思空遣夢魂勞蕭吹
夜月江橋酒榭泛秋風海市濤故國山川
吳分野美人辭賦楚離騷瓊花新製爭傳
寫應使揚州紙價高

項 烟 字可立

金陵懷古

江左夷吾浪得名豫州英槩亦沉冥夕陽
枯樹山如赭秋雨荒台艸自青漢苑玉魚

誰復葬昭陵石馬已無靈可憐白髮商人
婦猶向燈前唱後庭

其二

楚聲夜起忽傷悲運盡東南事可知塞上
竟誰金白去冢間俄見石麟隳祝宗端只
先期死丞相空聞復出師落日半江秋窸
窣乳鴉猶遶萬年枝

陳文杰

字漢卿

漢陽道中

老翁八十臥田廬回望中原淚滿裾盜起
山東多似螳民移河內半為魚戎衣已見
開金甲優詔曾聞下玉除白首孤城州縣
職無由得奏一行書

吳見恭

字寅夫

送唐漢卿

春風顛狂復細微吹波蕩槳動人衣野桃
葉小流鶯至官柳條青江鱉肥稍別未嫌
頻作惡相逢自識故應稀腐儒竊祿真何

補回首滄洲白石磯

薛常州端午雅集

端午宮詞進閣門侍臣應得忝方尊御爐
畫扇金花細瓮繭朱絲玉臂溫太子題詩
成故事前朝報國荷殘恩更求醫士三年
艾携向壺冰炷自魂

張以寧

錢唐懷古

荷花桂子不勝悲江介繁華異昔時天目

山來孤鳳歇海門潮去六龍移賈充悞世
空無策庾信哀時尚有辭莫向中原誇絕
景西湖遺恨似西施

題釣臺

故人已乘赤龍去君獨羊裘釣月明魯國
大名垂宇宙漢家小吏待公卿天迴御榻
星辰動人去高臺山水清我有長竿數千
尺坐來東海看潮生

孫華

鳳山懷古

宋家事業如漢晉遺史班人今尚存南渡
衣冠元帝紀中山廟社靖王孫海門龍去
秋潮橫宮樹烏啼夕燐繁已恨無人似諸
葛生憎何物學桓溫

其二

王氣中流甲馬營殘星遙遶鳳皇城斯文
自可同三代吾老猶能語二京釋帝有車
將白壁太皇無艦載蒼生只今四海慙聲

教共戴堯天樂太平

天兵壓境陳宜中啓謝太后欲請
三宮浮海且云舟航已具后曰臨
安十萬百姓能盡載否遂迎王師

其三

故汴人材軼漢唐東南文物尚張皇荆吳
形勢傾丹鳳伊洛源流到紫陽宇宙自来
開曆數江山渾不管興亡空餘車馬塵埃
市猶作鷓鴣變化鄉

其四

莫向登臨起嘆吁
故宮今是梵王都
麒麟馭娑荒荆棘
鸚鵡頻伽張苾芻
輦道久無黃曲蓋
寢垣誰置白浮屠
望江亭子依然好
時有胡僧置酒壺

俞

俊

字子俊號雲東華亭人

渡江

膺月六日狼山下
浪花如雪勢吞舟
隔江隱々聞吳語
去國遑々學楚囚
白髮慈親

初屬望青衫
倦客不勝愁
幸存杜曲桑麻地
敢望班超萬里侯

楚州夜泊

漏鼓聲頻欲四更
野航燈火對愁明
城頭楚語驚鄉夢
舡尾吳歌動客情
漠々水雲聽鴈度
瀟々風雨自雞聲
離羣遠道何嗟及
未必江湖老此生

次高原朴見寄

年少簪花壓帽簷
飛觴走笋競春纖
空餘

老淚青衫濕遮莫新愁白髮添生計有涯
蠶上箔公庭無事鳥窺簾昔人漫說揚州
鶴自咲熊魚豈得兼

董佐才

過顏炳文梧竹軒

高梧十尋竹千挺一塵不到軒中央鳳皇
夜棲碧雲暖翡翠晝鳴蒼雪涼聲度書窻
月隳井影來棋局梢過墻何當拂衣遂歸
隱日拜慈親稱壽觴

董紀

題友人山居

烟蘿窸々蔭柴扉路入蒼苔一徑微江燕
定巢來自熟巖花結子落還稀脩琴有制
先抄譜沽酒無錢更典衣采藥山童終日
去夜深常與鶴同歸

張

樞

字夢辰

送友之戎幕

金吾上將開東閣白髮參軍起曲阿嚴武

故人惟杜甫馬周知已獨常何龍蛇久聞
繫兵甲烏兔高飛避網羅慷慨平生兩行
淚哀時更比別離多

宋處仁

字智民華亭人

杏園

天寶年中賜宴開慈恩寺裏看花來兩香
曉潤金泥帖霞影春翻綠玉杯詩客錦囊
還可賦花奴羯鼓不須催祇今萬樹臙脂
雪遺核應慙董奉栽

灞橋

石罅蘚蚪幻殼存將軍舊業許誰論波浮
沈瀝吞虹影玉琢連環鎖地根花信雨晴
春酒館柳陰樓倚夕陽村蹇驢奔走紅塵
客破帽題詩合斷魂

盧

昇

字廷舉高唐人

為王淡洲真人題登瀛橋

仙翁作橋臨岱宗木公金母來往同銀河
一夕失烏鵲白日半空垂紫虹雲氣每傍

石檻過水流直與丹池通我嘗曳杖躡其上彷彿如到滄溟東

東宗庚

字章孟

題如一流滄雪軒

白鶴步苔窺短楹浮烟微動鬢絲輕玉塵
落碾雷聲殷瓊乳滿甌雲影橫心入蓬萊
仙路杳書傳諫議夢魂驚却疑說法神天
坐散亂空花雙眼明

張

璧

字景辰陳留人

嘉禾

城樓倒影落湖波湖上風帆鏡裏過歸客
自炊菰米飲小娃爭唱竹枝歌梭頭艇子
輕于葉雪色沙鷗白似鷺此地將軍戰時
血春來丹漬蘚痕多

橫溪

扁舟東來歌扣舷四顧雲水心茫然蛟龍
見窟不敢唾星斗滿身如在天打鼓賣魚
江雨歇看山濯足溪風顛解衣典取酒一

石醉伴忘機鷗鳥眠

朱

芾

字孟辯號滄洲生雲間人

寄張子政

子政老人隱者流清溪繞屋似愚溝自編
蒲葉作素簡時瀉松花洗玉舟仲連未遽
蹈東海孺子還復屈南州別來情事想不
廢詩成應畫李營丘

沈伯脩

懷鐵厓先生

烽火南歸鬢未華草玄亭在水東家綠簣
新長叅差玉瑀樹能開頃刻花坐按小娃
歌白苧醉呼稚子整烏紗麟洲別業清無
暑翠盞時浮五色瓜

釋守仁

寄友歸上洋

四月南風吹白沙春江遊子思無涯讀書
未築巢東舍送客先歸海上槎萬里黃塵
悲戰馬滿城紅雨亂飛花傷心不折湖邊

柳更待重來駕小車

柯九思

飛龍亭

謝安墩上新亭好玉斧鑿旌紀昔遊五鳳
曾瞻天子氣六龍俄起帝王州元戎談笑
收京闕阿閣論思侍冕旒一臥滄江今白
髮鼎湖雲斷使人愁

送黃鍊師

橘皮書壁走龍蛇池上芭蕉又見花北闕

承恩新雨露西湖光動舊烟霞春風日長
玄都樹秋水星回碧漢槎脩月功成三萬
戶藥珠宮裏誦南華

周之瀚

石碁子

碁子灣頭千丈渦沉心出世恐無多自然
黑白分明見天巧團圓不用磨本與閑人
消日月却教平地起風波不如煮作仙人
供更覓山中爛斧柯

王澤

寒食

天星夜落水犀軍又見吳宮走庶群
眈眈金湯徒自固倉皇玉石竟俱熱
將軍只合田橫死國士曾無豫讓恩
風雨明年寒食節麥盂誰上太妃坟

釋原本

字立中

寄杭州許萬戶

八月錢唐蜃氣紅守江諸將漫論功
遐荒

未盡歸王貢南海初聞奉使通帥閫
旌旗低白日山城鼓角起悲風不須弔
古追前事秋草離離滿故宫

釋靜慧

字古明

題天馬圖

八尺飛龍十二閑飄飄來自崑崙山
曾陪八駿崑崙頂肯逐群雄草莽間
落日倒行悲峻阪西風苦戰憶重關
拂郎可是無新貢天步于今政險艱

沈鉉

字文舉

趙松雪故宅

故國西風王氣銷
珊瑚玉樹半漂搖
曾瞻東壁迴天象
故着南冠續漢貂
第宅空存森衛戟
墨池乾盡尚蘭苕
高情一去風流遠
夢憶簫聲第幾橋

釋志瓊

字蘊中

深秀亭暮春述懷

空連雨濕聚華首
回首東風憶遠人
玉砌

香銷行跡斷雕闌
吟徹別愁新樓臺半是
前朝景桃李都承舊日春
歸燕多情還戀主
銜泥雙拂盡梁塵

俞

鎬

字孟京雲間人

寄董良用

東望雲山翠幾重
烟波只尺是婁淞
十年爲客荒三徑
百里憐君住九峯
把酒每懷彭澤令
放歌甘作廡門農
闔閭風景渾非舊
愁聽寒山半夜鐘

董佐才

細柳營

應試

棘門霸上皆兒戲，只數條侯細柳營。
天子徐行恩至重，將軍不拜禮非輕。
渭城萬樹春陰合，漢室千年塞虜平。
他日從知可堅卧，豈愁奔竄有吳兵。

張守中

字子政

次堵無傲中書宣使過維揚

鶴鳴雨後淡雲天，三月花飛水滿川。
暖吹

欲迷沽酒館，春城還泊載書舡。
新詩句法傳江上，壯歲功名到日邊。
瀟灑使君懷抱闊，相逢又喜五門前。

顧

或字孔文

無題

灤河開國世還淳，職貢梯航罔不賓。
珠樹木雞炎土物，紫駝黃鼠朔方珍。
雕題大老鏤金珥，漆齒酋王冠玉麟。
荒服年來朝貢絕，包茅責貢竟何人。

其二

百年功業自天開
化洽周南陋漢才
朱鴈每從南海獲
白禽還自越裳來
綉衣玉斧嚴丹陛
衮冕桓圭列上台
政典有餘戎備略
秋風滿地獨興哀

張昱

寄王梧溪

仙舟曾記過南堂
鳴鳥高梧日正長
蝴蝶重來春夢覺
牡丹欲盡燕泥忙
當時賓客

知何往此日音書或漫忘
猶有白頭王粲在
獨將詞賦動江鄉

買問

感懷

關河北望正愁人
且復雲間托此身
一片丹心昭日月
數莖白髮老風塵
箕裘嗣世慚無子
菽水承顏喜有親
自是故園歸未得
杜鵑啼破越山春

題葉隱居雪蓬

朔風吹雪滿溪灣一葉憑虛獨往還擊楫
正思歌玉樹舉頭驚見失青山曉窮滄海
模糊外夜泛銀河浩蕩間咲殺當年韓刺
史苦寒騎馬度藍關

葉杞

揚文舉先生辟宣政院掾

西方象教被中華寶幣絲綸示寵嘉冠冕
總依金粟影香雲常近紫薇花日長臺院
機仍暇春滿湖山跡未賒獨喜掾曹儒自

守只將經史載三車

謝楊建德過舉

艱危懷抱一時開忽拜黃堂手札來鴻鵠
風高羅剎渡燕鶯春滿客星台親闈正爾
嗟垂白清議無煩到不才聞說棠陰多樹
德倚樓長詠北山萊

輓樊叅政

公諱執敬字時中濟寧人由丁丑
進士累官拜侍御史轉江浙省叅

政至正壬辰徽寇陷杭城武臣野
遁公單騎前驅戰死于歲寒橋下

并記

中臺御史新叅省南紀妖星正合圍主將
向來推右族漢人那得預戎機戈麾落日
先身死雲慘青山未骨歸惟有鄂王雙宰
木歲寒流水遠含輝

輓楊貞外

公諱乘字文載濟南人由叅議府

掾累陞江淞省貞外郎徽寇陷杭
朝廷以大臣失守罪公既依故
人章軫德居龍江至正丙申今太
尉時稱王中吳遣使聘焉公咲曰
吾豈事二姓遂經死

太息南冠久陸沉百年風節見于今王嘉
不赴公孫詔朱泚寧移秀實心南海有靈
歸夜月荒原無樹着秋吟不知江漢新降
鬼曾憶天朝雨露深

輓楊左丞

公諱完哲字世傑廣西之武岡人
兵興率苗丁應募英慄勇悍所向
多克官至海道元帥江浙省丞
相達識公義制公叅知政事
時淮張氏稱王中吳勢卷浙右公
振師復省治保嘉禾既張氏降江
浙省奏拜張太尉淮南平章行樞
密知院公加本省左丞越二年張

發兵掩襲丞相陰拱竟不之援公
嬰城閉守且斬賜馬享士卒諭以
大義拒戰十日遂經死弟伯顏同
死之幕下負外郎王國賢嘗直言
侵丞相丞相殺之

馬首星河半壁天東南保障豈徒然越陀
新拜中朝命吳會重頒至正年故土未歸
師竟老長城雖壞節能全碧梧池上躡孤
鳳他日應慚義鷓鴣篇

輓余忠愍公

公諱闕字廷心青陽人明經登癸亥榜同進士第二人兵興以淮西宣慰使出鎮安慶時寇起上游遠近瓦解群當淮江衝要公堅守六年日夜禦戰朝廷聲聞不通芻餉道阻公經心締思賞罰信跡令明與士卒同甘藜由是俘獲莫計卒以援不至食且盡城遂陷公偕妻

子盡投水賓從偏裨俱死者六百餘人

江淮風急鳥蛇空特立旌旄板蕩中萬里
懸弧班定遠蒞城忠烈漢臧洪瓊林星漢
回文運皖國雲山誓武功尚憶綉衣行部
日遺民揮淚浙河東

吳哲

讀文丞相唵嘯集

忠臣就死古來多丞相謀生脫網羅要為

春秋明漢賊忍題風絮泣山河網常道在
詩千首骨肉情長賦六歌留得精誠等光
嶽奸冤佞鬼柰愁何

丙申三月從平章左公總戎臨安過
南山訪鐵崖時溪漲馬不克渡延伫

口號

旂旄晨趨十萬軍衛青幕府事紛々臥龍
不遠滄溟窟走馬期看館閣文春過名山
花亂落雨晴飛瀑路難分先生高伴洪厓

咲獨向溪邊望白雲

西江有感

姑蘇臺上白雲飛城郭人民半是非方寸
有時忘匕筋夢竟無夜不庭闈從來此地
音書絕漫恐還家骨肉稀孝道未全那敢
死暗將孤淚濕征衣

小孤山

俗繆爲小姑上有聖母廟像在山
爲

中流玉卓迥無群大海雄關自楚分宋高宗大書額其屋曰海門第一關絕頂薰香常蔽日靚妝樓閣不藏雲孤根暗植龍栖宅亂水平鋪鳥篆文我欲維舟明月裏爲神鼓瑟俟湘君

題豫章銘孝紀所藏米元暉畫卷時

久不得東吳消息

淞陽之居何處尋展卷聊復慰幽心門前鷺去花事畢屋裏雨鳴江樹深微茫漢月

墮燕艸窈窕吳歛成越吟南宮仙人獨不死白雲歲々蒼山岑

遣興

徒走何憂髀肉消賦歸無待楚辭招摩挲藥籠三年艾蕩落人寰五石瓢蓑笠兩淹滄海釣芥斤晴趁白雲樵遊仙枕上西池月轉覺東華曙色遙

七夕漫成

烏鵲梁成一歲過靈風此夕度鳴珂鸞釵

再合駢金股牛渚重来失素波
巧落人間徵應少愁歸天上
別離多迴車月黯無消息
香霧雲鬢柰爾何

寄王梧溪先生烏溪隱居

有幽貞谷

濯風所

陸海囂塵竟不開
早從人世得天台
扶藜洞口朝雲出
濯髮林端夕吹來
述作才長勞汗竹
謀謨籌在潤生苔
喜聞家政傳諸子
十畝黃雲總酒材

和張拱辰
葦中秋傳波韻

頗怪清狂廢客眠
桂花飛雨落瓊筵
宮壺漏轉烏啼樹
仙佩聲微鶴上天
載月輕槎渾泛葉
吹雲長笛摠如椽
百年高會誰能記
一爲新詩作浪傳

王

嘏
字伯純

送秦東海法師遊上清

爲愛仙山絕世氛
蒼苔寂寞路難分
白羊歲久渾疑石
瓊樹春深半是雲
洗藥泉香

龍蛻骨吹簫臺迥鶴成群隱文祕訣無人
識我欲相從一問君

寄倪元鎮

赤水丹山兩隔塵麻姑書信莫辭頻久知
鴻寶飛騰術獨許青雲磊落人賓戲能消
春晝永茗香聊試石泉新東風回首西陵
道重擬携書與卜鄰

送錢思復提學歸曲江舊隱

湖海多年鬢欲銀一官依舊廣文貧淹留

濁世惟懷土窳冥青衫不受塵酒伴凋零
元自少詩筒來往莫嫌頻曲江春水應無
恙安得相從與卜鄰

林

洵

字季文天台人

送顧謹中赴

國學

洪武初年監學開
大明天子育英才不徒貞觀儒風盛載喜
新羅子弟來佩影三千環壁水書聲日夜

徹蓬萊君今此去文名著行見奎光近上台

其二

春來四海喜昇平花氣浮香日晴儀鳳舞

庭爲世瑞神駒脫御向人鳴英年好試春秋學美譽曾傳月旦評

聖主求賢端爲國虎頭不負有雲仍

陶宗儀

字九成丹丘人

激懷樓爲章處士賦

樓倚青霄護赤闌時登眺瀕人寰窻含
虛景東西仰坐挹清暉四五山古調寂寥
惟自適野情蕭散寄餘閒塩埃迥隔圖書
祕好約遊仙共往還

送殊上人游武林聽法

湖上諸峯入望青尋幽歷歷記吾曾半篷
殘雪溪南別一錫間雲雨後登時向定回
聞戒法便從悟處剖宗乘明年二月還相

迓且說傳來第幾燈

胡謙 字彥恭雲間人

題張子信雍翼紀行詩集後

有子早傳丹桂芳明年

上國快觀光平生學業真無負弱冠聲名

獨擅場清渭水流春汨 太行山色曉蒼

此行足慰平生願拾得驪珠滿錦囊

大雅集卷之六

大雅集卷之七

天台賴良善卿編輯

會稽楊維禎庶夫評點

李孝先 字季和號五峯永嘉人

鑑湖

賀家湖裏見秋風放翁宅前東復東兩邊

雲樹忽遠近十里荷花能白紅行人濯足

銀河上越女梳頭青鏡中我欲張帆上南

斗扶桑碧海與天通

丁復

字仲容號雙檜老人天台人

寄茅山黃宗師

飈輪峯頭鶴下空華陽洞口百花紅長林
藥艸無人識上界蓬萊有路通爛醉前年
春作客頗憐去日老成翁丹砂不遣來城
市故著題詩寄葛洪

送僧之浙東

我家浙東海水西危峯高上作天梯蛇喉
尊者秋歸洞虎背禪師夜過溪曉日桃花

山更好春風藥草路多迷何堪相送寒江
上短髮頻搔不更齊

張天雨

字伯雨號句曲外史錢唐人

荅鐵厓先生

弄水摘花春可憐風雨倦尋茅步船我家
南塢有靈石龍井西顧無杜鵑野鶴乳雛
畏人過弱柳委地趁蚕眠子雲何爲甘寂
寞後世何人知太玄

其二

黃茂樓中但飲酒樓下長溝鳧雁多灣頭
橋斷迷青草闊處風來生白波饒奴竟煮
脫棚笋老魚戲啞如錢荷詔書寬大來海
角河北飢民爭倒戈

錙若水

字澹齋澄江人

因觀張仲舉張景亮和盧廷舉詩次

韻

乃翁同醉鬱輪袍花老元都幾樹桃湖海
交情三世舊兒孫文彩五雲高石門仙去

春如夢翰苑詩來句入騷山月江風無盡
興酒瓢何日爲重操

倪

瓚

字元鎮號雲林子昆陵人

送賴善卿采詩

陳詩昔在周盛日刪詩已是衰周餘祖述
孰能加四始研窮我已后諸儒嗟子用意
六勤厚聽音知政非迂踈願排閭闔獻采
錄坐變四海如唐虞

題本立中上人雲山望松圖

西望雲山何處亭鶴歸松栝秋冥々上人
不廢慕莪句山室長書貝葉經未應佛法
外孝弟定感仙手鐫碑銘過家上冢世代
隔慟哭亭前蘿月青

次朱孟辨見寄韻兼柬立中蘊中二

大士

江水空青外卜居會衝春雨過平湖雲山
欲覓無聲句花果誇傳沒骨圖莫倚陸機
曾入洛最憐張翰獨思吳本瓊二士平安

否應共清吟對酒壺

顧瑛 字仲瑛號金粟道人崑山人

唐宮詞次鐵厓無題韻

天寶雞人寵賈昌不教胡蝶上釵梁錦裯
盡浴驕天子絳節朝看王大娘芍藥金開
闌內苑蒲萄玉琖酌西涼月支十萬胭脂
粉獨有三姨素面粧

其二

蓮花池畔暑風涼玉竹迴文寶篋光貪倚

畫屏開翡翠誤開金鎖放鴛鴦輕綃披霧
誇新浴墮髻歌雲銜晚粧咲指女牛私語
處長生殿下月中央

其三

五色卿雲護帝城春風無處不關情小花
靜苑偷吹笛淡月閑房背合箏鳳爪擘金
鈿合龍頭瀉酒下瑤嬰后官學做金錢
會香水蘭盆浴化生

其四

龍旗孔蓋擁鸞幢步輦追隨幸曲江鳥道
正通天上路羊車直到竹間窻桃花柳葉
元無恨燕子鶯花各有雙中貴向人言近
事風流陣裏帝先降

其五

秘閣香殘日影移燈分青玉刻盤螭琵琶
鳳結紅文水弦索蠶繅綠水絲金屋有花
頻賭酒玉杵無子不彈碁傳宣趨發明駝
使南海今年進荔枝

其六
近臣諧謔似枚臯侍宴承恩得錦袍扇賜
方空描蛺蝶局看雙陸賭櫻桃翰林醉進
清平調光祿新呈玉色醪密奏君王好將
息昨朝馬上打圍勞

其七

豨國來朝不動塵障泥一色繡麒麟朱衣
小隊高呼道粉筆新圖徧寫真寶雀玉蟾
簪翠髻銀鷺金鳳踏文首一從羯鼓催春

後不信司花別有神

其八

五王馬上打毬歸贏得宮花獻貴妃樂送
閤門身奏少禍目臺寺諫書稀侍兒隨幸
皆頌紫骍子蒙恩亦賜緋姊妹相從習歌
舞何人能製柘黃衣

其九

新製霓裳按舞腰咲他飛燕怕風飄玉蚕
倒臥蟠條脫金鳳斜飛上步搖雲母屏前

齊奏樂沉香火底並吹簫只因野鹿銜花
去從此君王罷早朝

其十

宮衣窄々小黃門躑躅初開賜縹盆夜月
不窺鸚鵡冢春風每憶鳳皇園愛收花露
消心渴怕解金珂見爪痕只有柵房老宮
監白頭一一話開元

評曰十詩綿聯縟麗消得錦半臂
也

郊

韶

字九成吳興人

和報復元秋興

大星出海芒角稀新月隔林光景微空山
無眠雞犬靜獨樹忽驚鳥鵲飛已喜朝廷
寬賦歛側聞南國尚戎衣釣竿早晚落吾
手日々放舡來小麻

鄭蒙泉鍊師子午谷圖

子真今住子午谷乃在蛟門西復西繞屋
長松落晴雪倚天絕壁立丹梯春回大壑

三芝秀月滿空山一鶴栖歸去看圖望瀛
海定應休髮候天雞

郭

翼字義仲崑山人

送人遊武當山

武當諸峯何壯哉大朵小朵青蓮開玄聖
中居天地戶赤日下照金銀台神龜六眼
霓光走山鬼一脚雲頭來道人再拜望北
極應帶滿身星斗迴

懷鐵厓

揚子十年官不調湖山不負謫仙才洞庭
鐵笛龍吹得后土瓊花鶴寄來車子看花
將一輛雪兒勸酒拗蓮臺時對客理弦
索月色羅衫小袂裁

評曰人呼老郭爲五十六以其長
于七言八句也觀此二首可知其
大概矣

成廷珪

字元章維揚人

送張思廉

讀書不逢萬乘主
挾策肯傍諸侯門
放歌蘇台晚
山碧濯足太湖秋
水渾千金未易買
駿馬一飯何足哀
王孫風塵拂衣且歸去
高臥桐江雲水村

顧逖

贈張玉笥

張公學武萬人敵
玉笥讀書三十年
未請尚方誅佞劍
且營東海買山錢
異鄉感慨秋風鴈
故舊徘徊雪夜舡
好作黃金台上

客于今郭隗在雄燕

贈馬敬常

戎馬紛紛北渡河
將軍勛業尚蹉跎
十年鬢髮時看鏡
萬里風霜夜枕戈
知己有如齊鮑井
得君無復漢蕭何
錦衣未解歸鄉國
南越封王屬尉陀

茅毅 字子剛廣陵人

次上克莊韻

弱流瀛海三千里
明月揚州廿四橋
雲擁

鰲頭山在望風吹鶴背路非遙
參差瓊館珊瑚樹縹緲紅樓
碧玉簫二老往來人所羨
欲憑畫史寫生綃

次成元璋韻

淮南故老凋零盡獨有先生是俊髦
到處談詩聽夜雨長年作客典春袍
山雲墮地忽九朵湖水鑑空無一毫
即景懷人思何限誦君佳句課兒曹

高志道

送俞子俊調平江府判

耆童羅拜長洲上正是官舡到岸時
流水落花西子宅故家喬木范公祠
愛蓮池上留嘉瑞種樹雲間動去思
素屏高堂應看畫公餘還有寄來詩

次楊鐵史飲西湖亭韻

惟知湖上新亭好百歲襟懷一咲開
今日共憐吳下客與君且盡掌中杯
夕陽半壁白鷗過秋色滿簾鴻鴈來
勲業未成頭欲

雪幾時重築釣魚臺

贈程彥明

不見瑤花近十年月明無復看神仙已知
陳迹俱長往欲賦閑情絕可憐茅捲秋風
誰補屋波乾滄海忽成田故人邂逅徒興
感且覓江南買酒錢

陳堯道

字宗遠因所居自號竹林處士嘉禾人

松瓢齋爲王好問賦

身外纖微皆長物一瓢飲足寄蒼虬壺中

日月縣林表天上瓠瓜下礪幽器大從來
成濩落時危那得事沉浮只憂尚渴陶唐
化未放先生學許由

挽邁里古思

小范胸中有甲兵檀公身後壞長城大星
動地中軍愴白馬憑潮霸主傾碧血不隨
金石化丹心長貫斗牛明會稽高與梧溪
並誰與磨厓刻姓名

李

復

字道原天台人

題華亭監縣奉

御酒省親卷後

昔年司鑰奎章閣父守芙蓉江上城問寢
不忘人子事乞歸身荷

聖恩榮親庭喜動五絲服御酒香浮雙玉
罍今日南來花滿縣累茵列鼎重關情

贈張萬戶征閩凱捷

瘴雨蠻烟遠蔽空只將談笑蕩群兇旌旗
夜捲妖星殞鼓角秋高殺氣雄已喜張良

還灞上更須龔遂守閩中凱歌聲動天顏
喜金虎三珠擬報功

鄭

洪 字君舉永嘉人

白塔寺

江山襟帶尚依然王氣消沉已百年八葉
龍孫東入海六宮綵女北歸燕銅駝荆棘
西風裏石馬莓苔落照邊玉柙遊魂飛劫
火五陵嘉樹不啼鶻

浙江亭

海門潮水貫長虹天際山形隱伏龍南省
官官終日醉西陵烽火隔江紅黃金不鑄
岳武穆青史直書劉巨容蕭瑟江南哀不
盡庾郎辭賦若爲工

馮以默

字洪如號彈缺生雲間人

雲山樓

絕海高樓吳下聞金山秦山春日曛仙人
玉笙下紫鳳神女螺鬟洗白雲金碧芙蓉
開錦繡蛟螭烟霧濕秋文上頭三月東風

李紫箕

謫仙今住五茸西醉后懶披官錦衣天上
玉堂無夢到山中書艇載鷺歸白雲滿坐
詩連軸大泖當門鱸正肥安得造君清隱
處紫簫吹月轉山扉

題謝仲允一掬泉

石湖之奧有甘泉一掬清泠絕可憐金鯽
跳波明水上彩雲浮石紫苔連流盃夜醉

雲松柏洗華春留鐵笛仙翠閣紅闌誰是
主東山太傅子孫賢

吳

毅

字近仁富陽人

題君山吹笛圖

洞庭帝子罷張樂銅龍夜嘯秋冥冥老蛟
起舞珠宮月白石亂殞銀河星赤壁孤舟
泣嫠婦蒼梧別淚啼湘靈鈞天寥々萬籟
息君山一髮烟中青

鄭

采

字季亮永嘉人

姚子章之浙東帥掾

南紀四明雄浙左孤城百雉接風濤越裳
客去得犀角日本舡來看寶刀元帥旌旗
開外閩掾郎才略服諸曹帳中羽檄何須
艸政愛夔州詩法高

送果上人遊鴈山

雪消山色漲東州最好天台鴈蕩遊背負
青天綠鳥道面承飛雨看龍湫深春林蘂
多金剝落日江湖自白頭石上玉芝應拾

得念予無物可消愁

尤存 字以仁吳郡人

送李紫篋歸澱山草堂

積玉溪頭水拍天
草堂只愛澱山前
鳴鳩啼鳥青春裏
古木踈篁落照邊
仙客近傳飡玉法
故人時送買山錢
相逢未盡一杯酒
陸相祠前又發舡

釋曇噩 字夢堂四明人

題杭州報國寺儀鳳軒

溇江之上青崔嵬
山勢遠從天
日來錢氏豈能當
王氣郭生端復是
仙才光搖海
旭九苞動影拂雲霄
雙翅開為我
翩然覽輝下一軒
著此亦宜哉

釋宗衍 字道原中吳人

春日西湖懷古

錢唐父老眼看天
破國猶能話昔年
江州忽嘶江北馬
風帆不返海南舡
空陵落葉無人掃
廢苑餘花只自妍
此日西湖回白

首功名若箇在凌烟

秋興

一別空山舊州亭衣裳五見點秋螢沙沉
短艇餘菰米苔臥長鏡老茯苓弱水蓬萊
那可得瞿塘灩澦不須經歸帆早晚吳波
裏嫋々涼風望洞庭

釋梵琦

字楚石四明人

送康上人之京

花隔深宮柳拂墻少年仍值好春光風飄

玉珮縈雲曲日射金鑪夾道香一色樓臺
天蕩々九衢人物海茫茫筐中舊筆今零
落猶記題詩鳳沼傍

釋元本

富春歸隱圖爲鐵厓賦

小橋流水隔紅塵亦有漁郎解問津要路
只聞收壯士好山還許住閑人每思李愿
歸盤谷獨愛嚴陵老富春便擬采芝歌隱
曲白雲紅樹漫爲鄰

泊霍井亭有感

涼飈微動水雲收
鷗鷺無聲泊處幽
露落梧桐雙井冷
月明砧杵萬家秋
貪歡盡醉吳姬酒
長往誰同范蠡舟
最憶多情鄭司馬
琵琶和淚上江州

送趙僉憲還司

執簡曾趨玉几傍
繡衣猶帶御爐香
九重哀詔蘇民瘼
一道激清肅憲綱
興學已尊周禮樂
好賢多紀漢文章
鯨濤已息豺狼

伏歸騎嘶風滿路霜

釋智寬

字裕之號雲海吳中人

送尚書王公轉漕還京

白髮蘭臺老鄭崇
野人爭識舊乘驄
青冥斧鉞來南國
碧海樓舡駕順風
夜指星樞天直北
曉瞻雲氣日華東
趨朝正及端陽節
細葛承恩出漢宮

送王景華道士之京

羽客思歸尺五天
雙危直上紫雲端
玉簫

聲徹春空迥寶劍浮光夜月寒夢入瑤臺
香冉冉走趨青瑣珮珊珊奉顏重進長生
籙南極星迴太乙壇

釋永彛

字古鼎雲間人

南屏雨中

五月雨聲連六月南屏雲氣擁柴扉林巒
有月山精出巖谷無人石燕飛詩句偶從
行處得家鄉多在夢中歸曉來杖策湖頭
去春水溶溶沒釣磯

李節

字處約穎上人

寄唐伯順

鶴林宮裏故人過謝傅宅前秋水多烏帽
吟餘還放棹黃庭馮罷更籠鷺平頭奴子
金盤露皓齒佳人白苧歌不得相從渡三
御月明清夜柰愁何

和高以敬

別君九見歲華新邂逅相逢亦可人靈鷲
峯前看飛瀑鶴林宮裏度殘春時時送客

傷南浦夜々占星對北辰莫話當時舊游
處落花芳艸倍傷神

徐

津

字仲盟江陰人

哀李江州

強虜西來把漢旌潯陽烽火照江明朝廷
重鎮推虞詡風雨孤臣失杲卿戰哭幾家
思舊尹鬼兵長夜護空城王師百萬知何
地春草春波獨愴情

客懷

白雲回首暗巫門綠髮蒼々碧眼昏亂後
情懷千日醉故交文物幾人存秋深狡兔
先營窟日落烏鴉尚識村樓上風高笳鼓
急楚鄉多有未招魂

釋曇墳

字大章天台人

送王宗禮尚書趣運還京

轉海雲濤萬里賒長風指日望京華南州
已入諸侯貢北極初回奉使橈內燕宮花
迎馬酒御溝官柳拂龍沙從容好奏安時

策遂見車書混一家

次慈元怨韻

茅屋住在清江曲
蕭洒渾无俗
客過流水自懸春
藥確落花間
度煮茶鍋不耽
玄石三年酒只賦
梁鴻五噫歌
退食歸來塵事少
舊遊回首隔風波

陸

炯

字晦叔號書篷漫郎吳下人

送融水縣尹

清朝才士多如雨
之子聲華重講筵
天上

玉堂辭聖主嶺南花
縣得英賢蠻烟秋暗
枕榔洞瘴雨春深
蘇荊田莫道衡陽無過
鴈好題書寄五雲邊

達溥化

字仲困號鰲海龍城人

讀班升皮王命論

丹鳳黃龍降自天
玉皇金鼎在遺編
漢王未必從陳勝
秦帝何曾愧魯連
堯聖善推行揖讓
啓賢能繼事相傳
升皮宏論終天在
好為群雄一再宣

鳳皇山望潮日

滄海全吳當百二坐臨溟渤鬱陶開日含
金霧天邊出潮捲銀河地底來雲淨定山
浮砥柱天高秦望見蓬萊東南檣櫓年來
少獨向江頭一愴懷

張以文

雲間人

秋懷

小閣柴扉抱鶴汀石田老圃事躬耕函關
望氣青牛駕泰礪書功白馬盟漢主山河

千古在伍王潮汐幾時平坐看落日楓林
晚厭聽江城鼓角聲

劉儼

字敬思錢唐人

南屏別墅圖

竹裏深藏聽雪齋花邊小築御風台雲嵐
倒影水天迥蒲葦有聲山雨來內史幽情
觴詠樂右丞別業畫圖開何時許我遊真
境野色橋邊踏紫苔

舟中

青天縹緲吹雲衣碧水顛倒插翠微三家
五家村舍出一點兩點沙鷗飛柳枝裊
拂過艇苔花斑々生釣磯風塵不到是樂
土故人莫恠入城稀

丘

民 字克莊邗城人

題柯敬仲竹

奎章閣下文明日偏寫琅玕寄遠遊疎雨
夜啼湘女淚蜚鸞朝下羽人丘月移簾影
金閨夢風度簫聲玉宇秋幾見畫圖憐往

事碧雲凌亂使人愁

和顧仲瑛平湖草堂詩韻

十二行窩總是春平家湖上草堂新養來
白鶴須教舞浴出花驄不受馴桂樹謾歌
招隱士麻門今屬姓龐人錦囊合貯詩千
首聲價流傳海內民

送友人入杭

又隨南鴈過錢唐不道并州是故鄉江上
秋風萼菜羨山中春雨石田荒杜陵老去

寧忘蜀江總歸來不是梁欲采芙蓉贈君
去錦雲零落倍淒涼

沈

震

字伯脩華亭人

題春暉堂

萱草花開滿北堂繡簾垂地護清香晨飴
進饌冰鱗美夏扇迎風暑簟涼燁燁春暉
生寸草澄々璧月霽孤光瑤池宴罷蟠桃
熟白玉壺中日正長

銘

堧

字小齋江陰人

送曾德輔都事督海運

畫省郎官親海漕龍驤風熟綵颿飛銀河
天闊開黃道柳木星高近紫微漢室重看
糧運足邊庭今見欵書歸定知劉宴回朝
日秋水光生御賜衣

送徐性全回東州

三月江南杜宇啼鶴坡風暖水平堤故人
別酒交情重游子歸舟客夢迷謝傅堂前
春樹合越王臺下暮山齊到家依舊多新

咏棣萼萱花取次題

送李象賢歸省

秀拔赤城山水奇
吳松江上久相知
每懷衣錦還鄉志
猶憶擔簦渡海時
喬木百年存闕閱
高堂重慶享期頤
莫目猿鶴頻留駐
天上風雲已有期

張經 字德常京口人

次鐵厓韻

春風滿袖折花回
高臥雲間百尺臺
天上

賜袍香霧濕河東
獻賦日華開
頻煩太守高軒過
屢見元戎小隊來
我欲將車侍親去
綵衣花底學提孩

全思誠 字希賢華亭人

送黃仲珍會試

喚鶴灘前凍雨收
賓筵再詠麻
呦呦右文天子春秋富
勸駕諸侯禮數優
日下五雲生北闕
天邊一鶚起南州
遙知入射丹墀策
象管翻思不休

寄虞彦高縣尹問疾

陶令西山去養痾秋來病減幾分多千年
松下得琥珀萬壑雨餘生薜蘿有客饋魚
供野酌何人擊竹和樵歌長吟不盡相思
意矯首霜前一鴈過

邵思文

字茂文

感興

聞說昭王未築臺此生空抱濟時才青衫
外史江南老白髮中官海上海來自信文章

追董賈可能游俠效鄒枚春風處處堪腸
斷莫上層樓看劫灰

其二

鳳皇山下野花開又見東風燕子來主將
深居營玉壘王官行樂載金罍裂麻解使
陽城哭作賦徒令庾信哀多少高人隱屠
釣尚推門第不論才

白塔寺感懷

浮屠千仞獨崔嵬官殿巍々盡劫灰玉樹

已消龍虎氣青山長繞鳳皇台城頭戰鼓
連雲起沙觜殘潮帶月迴萬里英兔歸未
得不思泥馬渡江來

成廷珪

字元章

贈綾錦墩隱者

手拄烏藤五尺長山行時著古衣裳缺文
自補雲間志賣藥多收海上方茆屋秋風
催釀秫錦墩春雨看移桑野人咲指長安
路馬足車塵有底忙

袁

舉

字仲微

秀峰懷古

湯池壁壘上王城奴隸猶聞至德名差闕
久摧神木柱胥祠仍薦血毛牲空山落日
狐狸出荒徑秋風麋鹿行橫槩豪吟竟何
在水流東去寂無聲

袁藏用

贈道士

十二靈鼇戴五峯道人家住藥珠宮蒼龍

出匣劍氣紫朱雀在鼎丹光紅夜浮星槎
游瀚海早朝天闕步剛風羨門相遇知名
姓言在東華碧簡中

釋至瑀

字蘊中

次李菊莊韻

十二行窩取次游道人處、任風流艸衣
踈散乾坤老蓆帽飄蕭湖海秋太白狂歌
沽酒館元龍高臥讀書樓相思兩地同明
月南北誰云異馬牛

黃

常

字叔彞江陰人

題海雲樓

見說飛樓高入天凌雲東望海如川乾坤
影侵三山樹吳楚青連萬古烟鶴背笙簫
天籟發龍噓簾箔夜珠懸從游擬蒼登臨
願試上慈航一問禪

書懷寄陳叅軍

雙瞳澄澈紫髯飄早沐河陽遠見招赤羽
旗前催艸檄青袖幕底臥吹簫大堤花鳥

還應好南徼烟塵苦未消羨子匡時足經
濟餘波幸見及漁樵

俞

庸

字子中號凝清齋

堵無傲討賊獲功任金壇縣尹久別
無信作此寄之

春入枰盤歲復除故人不寄一行書虎頭
年少方投筆鶴髮慈親正倚閭鵬鷲雲霄
揚羽翻犬羊巢穴悉丘墟丈夫出處皆前
定莫向明時較疾徐

次陳伯昂見寄

關河瑟瑟暗風烟矯首遐觀獨悵然徒見
舟車勞驛使未聞山澤訪遺賢參橫古塞
初寒夜霜滿征衣欲曙天自咲儒冠只如
此窮通何必卜筮筭

病起

憶昔辭家塞北遊朝來何事怯新秋床堆
藥裹塵侵几風靜書窻月滿樓伏櫪長鳴
憐老驥引杯含淚惜吳鉤旌旗明滅西城

路落日長烟起暮愁

董成

送俞子中之弋陽尹

出宰江東試左轄津、喜色動椿萱大朝
恩澤承三世命服光華萃一門壯歲風雲
誠有待秋空鷓鴣正高騫弋陽父老郊迎
久預播清聲已可論

贈楊山居太史

曾懷荆璞詣天關雨露恩深賜佩環玉筍

簪班躋鳳沼金閨通籍侍龍顏尚書聽履
星辰上太史蜚英翰墨間厭直承明動歸
興錦衣光彩照湖山

送俞子俊麗水巡檢

為官當作執金吾膝上須橫丈二笏會見
黑頭我獬豸試看赤子縛於菟醉歌擊碎
玉如意較獵射空金僕姑眼底猩鼯俱掃
迹胸中有策致唐虞

楊達

字道夫號康莊子江陰人

訪王麟極不遇

王公子家江水陰
芙蓉爲裳錦爲心
焚香雨軒蘭葉淨
下榻月館梅花深
丹丘鳳皇不易見
碧海珊瑚無處尋
有客相思在空谷
歲月仰望來佳音

許

璞

字叔瑛華亭人

九日

世事驚心節又催
短衣破帽立荒台
斜陽木落烏爭噪
絕塞雲深鴈欲來
十載江湖

蓬鬢改幾家
離落菊花開
平原白骨知無數
誰向西風酌一杯

次成元章韻

海內風塵十載過
暮年飄泊柰愁何
讀書避地衡門小
拔劍成功甲第多
魏闕又聞來白馬
唐家還復獻金鸞
野人翹首雲林下
擬讀昌黎石鼓歌

董佐才

杜詩有感

幾年京國暗戈矛淪落誰憐杜甫愁春漏
也曾嗔錄事秋飢仍復問彭州平生忠義
窮逾見小技文章老更優我亦此生無定
處夕陽孤倚仲宣樓

述懷

大塊茫茫本自然杞人無事漫憂天百年
流景如雙轂一餽懽情直萬錢不是溪山
嫌客賞何曾風雨為花憐細推物理休鞿
束回首故人空墓田

題俞凝清小樓

凝清善畫

戶牖翛然樹杪開小樓新結俯池臺書聲
直與浮雲抗畫幅遙臨列岫來豈可胡床
留俗客莫教明月照空杯元龍豪氣今誰
繼述作頌憑沈謝才

林

洵

字李文天台人

觀丁祀

風作秋聲度八寰駿奔多士旦趨班宗周
禮樂修禋祀尊魯衣冠拜聖顏鳳宸香飄

涼月下龍旂影動瑞雲間萬年道統垂天
地洙泗東流遠泰山

董

紀字良史

送石達卿受淮南之辟

當代搜羅急俊英豈容徒老鹿門耕淮南
幕府多招隱水北山人最得名叅朮正須
歸狄籠鹽梅甫用入商羹只應湖上秋風
起猶爲鱸魚惜此行

錢惟善

三味軒爲張國祥賦

三味軒中品物殊客來日共飯雕胡四腮
鱸膾吳中有千里萼羹洛下無孫子流芳
真好事人生適意是良圖不曰命駕秋風
起那得高名在五湖

知稼穡軒

軒居誰扁知稼穡張仲孝友世多賢再三
嘆息戒無逸什一徵輸期有年睡濃黃犢
夕陽裏興在白鷗春水前迎寒逆暑何限

樂試誦函風七月篇

蔣惠

從軍謾興

士卒連艘窳不諱曉牽百丈步平沙霜橫
劍戟明秋水風颭旌旗絢綵霞最憶仲宣
能去國猶懷張翰苦思家無端又值江天
暮落日蒼烟動鼓笳

城東小飲

青帘挂處潑醅濃握手吟行夕照中滿地

雨晴芳草綠近墻春暖小桃紅當時不忝
登龍客今日惟懷失馬翁拚却青蚨同一
醉歸來戍鼓又鼙

鍾律

贈一齋進士

前朝進士今爲庶海上淹栖歲食貧風雨
厭看花富貴冰霜愛寫竹精神南州冠佩
閒中老北極星辰夢裏真邂逅相逢同一
咲蒼顏白髮老遺民

方克常

題春亭思親卷

暖風拂面百花紅日
思親望五茸夢入
承顏驚白髮權生捧檄動慈容
從官豈憚雲衢遠歸覲寧辭水驛重
蓮幕長才今小試化民匡政致公忠

慶振翁八十

八十仙翁兩鬢銀梅花標格玉精神
田荆樹老千年澤寶桂香分五色
春花下長歌

來窈窕膝前行酒舞麒麟廣寒更有嫦娥
約待看飛虹析木津

孫閏

立春日次陶玉樓韻

春江春水綠沄沄江上人家日欲曛
水木盡隨龍角化寒暄已退土牛分
縱橫誰復論王伯翻覆徒憐作雨雲
坐老年華心益壯生憎鳧鷖亂爲群

題罨畫清曉圖送劉錄事

朝日團紅映兩厓水光晴漾錦紋沙竹枝
草帶生魚鬣雲白山青相犬牙玉氣春浮
仙子蓋盡橋人似武陵家銀瓶且盡缸頭
酒千里相思隔縣衙

用石上海仲謙韻送李治中之紹興
任

勾吳客上越王臺駟馬駢々佐郡來伯主
尚憐文種死蒼生空憶謝安才帶江滌海
東南勝萬壑千巖紫翠開已喜民間魚稻

熟篋樓釀酒句新裁

大雅集卷之七

大雅集卷之八

天台賴良善卿編輯

會稽楊維禎庶夫評點

唐

珙

字溫如會稽人

過洞庭

西風吹老洞庭波
一夜湘君白髮多
醉後不知天在水
滿舡清夢壓星河

墨蘭

瑤階夢結翠宜男
誤墮仙人紫玉簪
鶴帳

有春留不得碧雲扶影下湘南

孫華

楓橋夜泊

畫舫夜泊寒山寺不信江楓有客愁二八
蛾眉雙鳳吹滿天明月按涼州

倪瓚

蘇臺懷古

望中烟草古長洲不見當時麋鹿遊滿目
越來溪上水流將春夢過杭州

李節

次冷起勝韻

金剛嶺頭山雨晴深林黃鳥最多聲草堂
隣近應只尺樓子正同雙樹平

張以寧

題爛柯山效宋體

人說仙家日月遲仙家日月轉堪悲誰將
百歲人間事只換山中一局碁

釋祖銘

字古鼎四明人

題尉襁圖

練光帖，雪光開倩得鄰姑，尉未裁郎在
征途兒在眼，十分寒向意中來。

陳昌

寄謝履齋

水沉香冷簟紋清，風入踈櫺鶴夢驚。今夜
天邊好明月，清光偏照闔閭城。

釋元本

秋夜懷崔府尹

銀河淡，月微明。花蘂闌邊，絡繹聲爲問
洛陽崔太守，幾何秋色在江城。

釋克新

字仲銘，番陽人。

次鐵厓韻

會稽山前賀狂宅，句曲洞口陶仙家。參差
樓觀五雲裏，飛佩時時凌紫霞。

其二

詞章近接楊夫子，丹術遙師魏伯陽。昨日
有書無犬送，祇令孤鶴遠傳將。

其三

白雲作衣霞作裾
太平不愛紫金魚
騎驢酒肆得佳句
都向琅玕節下書

其四

茅齋門泊武湖航
絕勝王家輞口莊
明月滿天秋滿地
碧簫引鳳坐胡床

徐孝基

寄孤雲上人

能詩六足張吾軍
何處林泉不寄身
最愛

竹西歸舊隱
擲杯海上看飛塵

程煜

題明皇並笛圖

華清宴罷捲霓裳
重立東風並海棠
鳳瑤莫吹新製曲
有人乘月倚宮牆

鄭

東 字季明永嘉人

題衛明鉉山水小景

故人招我鴈山傍
更入秋雲結草堂
至今未滿李徵士
白首猶貪著作郎

余

闕 字廷心

京師送友

光祿橋西昔解携，春星欲傍露盤低。自來
宮柳多離思，更著城烏在上啼。

題小景

長淮烟水遶城斜，壯士依依漂母家。日暮
棹頭人不到，蜻蜓飛上野菱花。

孫華

贈日本僧觀語孟

日本沙門性頗靈，自携語孟到禪扃。也知
中國尊朱子，不學南方誦墨經。

鍾

虞

字安期，吳江人。

送梁子才還宣城

越王城下水潺潺，暖照盡行人鬢影。班日暮
登臨，倍酸楚，直疑身在木瓜山。

其二

荔枝樹下三年客，識得王家十八娘。恨殺
釣龍台下水，送君先去斷人腸。

春雨雜興

誰向春風吹洞簫
蕩舟女子畫雙橈
不愁沾濕鴉頭襪
愁殺螺江兩度潮

其二

別院笙歌深復深
美人何處寫琴心
尋芳休怯春泥滑
明日池塘長綠陰

翁

仁

字德元章安人

題柯敬仲墨竹

湘江何處弔湘妃
極目愁雲是九疑
欲寄

所思秋水隔鳳簫
吹徹玉參差

馮以默

墨梅

一枝竹外夢春酣
零落綃裳舞翠嵐
天淡水平山月小
有人吹笛過江南

金

翼

字敬德天台人

題耿恭拜井像

據水先須護上流
鑿山抵用井中求
司徒不為將軍請
安得殘兵脫虜囚

題明皇曲江春宴圖

五雲樓閣擁層闌
帝子金根御白鸞
日夕醉花臨上苑
春風不似蜀中看

東宗庚

偶題

漁波微動上湘簾
圓沼初成小鏡圓
葉底翠丸青可摘
小娃纖手送吳鹽

董紀

絕句

東風細雨濕窻紗
日宴黃蜂未報衙
芳草滿庭隨意綠
時時吹落碧桃花

其二

小徑斜穿入竹林
曲闌通轉亞花陰
墻隈勢逼風如旋
落地殘紅幾許深

俞俊

次友見寄

白髮和愁取次生
關河千里故鄉情
自從秋鴈南征後
日夕淮邊問客程

秦州夜泊

蘆葉蕭蕭惱客眠推篷看雨月在舡漁舟
破曉入城去街頭魚蟹不論錢

張樞

題貴妃籠鸚鵡圖

內苑宮人紫綺袍金籠鸚鵡翠絲條當時
亦有承恩者不獨雲霄一羽毛

其二

宮樣蛾眉翠黛齊結鬟微安鬢雲低自憐

鸚鵡能言語不道漁陽動鼓鞞

買閭

八月既望訪古鼎上人時庭桂盛開
回賦絕句以贈

桂花影下坐談空恍在清虛玉府中海月
滿庭秋一色天香和露滴西風

春曉

香霧空濛落月低六街官馬散銀蹄芙蓉
帳底夢初醒臥聽栗留花外啼

張守中

得家書

半年京國夢鄉廬魯買盧溝雙鯉魚昨夜
燈花今日喜江南稻熟有家書

顧 或

讀漢史高帝紀有感

漢高功業與天高首事居山用太牢博士
未興書有律不能無意責蕭曹

鄭

昕

字彥文華亭人

荷亭雅集值雨

翠華擁出三千女玉杖扶持八十翁若使
此花能解語主人日 醉春風
芰荷着雨洗紅粧未必蓮花似六郎一種
風流人不識碧筒還勝紫霞觴

又賦

枝上雙 老白頭雙飛雙宿意綢繆問渠
何道頭能白穩處安身不濫求

趙

鎮

字元鼎號寄軒吳下人

題淵明像

托咏荆軻恨未消
解官卻赴遠公招
至今三月門前柳
猶向東風懶折腰

徐醉墨小像

濃淡烟雲帶石林
藤花如雪草堂深
只疑龍井山頭雨
飛過西湖作晚陰

其二

瓜皮艇子釣魚翁
烏桕根邊寄短篷
葉落不知深幾許
吳淞江上問秋風

題玉環調鸚鵡圖

畫闌花暖露初乾
妃子春容白玉團
含咲從容調鸚鵡
不知胡馬入長安

大雅集卷之八

黃岡饒星舫寫于滬上
八月

